



Na.34: Msimu wa Kilimo 2025/26

Tathmini ya Septemba 1-10, 2026 na Matazamia kwa Kipindi cha Septemba 11-20, 2026

MUHTASARI

- Vipindi vya mvua vinavyotarajiwa katika maeneo machache husuan nyanda za juu kaskazini-mashariki, pwani ya kusini na kaskazini vinaweza kusaidia kuongezeka kwa unyevunyevu katika udongo na kusaidia upatikanaji wa malisho kwa ajili ya wanyama. Pia hali hii inaweza kuathiri shughuli za uvunaji, ukaushaji na uhifadhi wa mazao.
- Hali ya ukavu inavyotarajiwa katika baadhi ya maeneo nchini itasaidia katika shughuli za uvunaji, ukaushaji na uhifadhi wa mazao ghalani.
- Wakulima wanashauriwa kuendelea kufuatilia taarifa za hali ya hewa za kila siku kutoka Mamlaka ya Hali ya Hewa Tanzania (TMA) kwa mipango thabiti ya shughuli za kilimo.


MIFUMO YA HALI YA HEWA KATIKA KIPINDI CHA SEPTEMBER 1-10, 2026

Katika kipindi hiki, migandamizo mikubwa ya hewa iliyopo kusini mwa dunia (St. Helena na Mascarene) iliendelea kuimarika wakati ile iliyopo kaskazini mwa dunia (Azore na Siberia) iliendelea kupungua nguvu. Hali hii ilidumisha mwenendo wa ukanda mvua kuendelea kuwepo kaskazini zaidi nje ya nchi. Aidha, kuimarika kwa mifumo ya hali ya hewa iliyopo katika ukanda wa Ziwa Victoria pamoja na upepo wa bahari wenye unyevu unyevu uvumao kutoka mashariki na kuelekea maeneo ya ukanda wa pwani na maeneo ya Jirani uliimarisha kwa vipindi vichache mifumo isababishayo mvua katika maeneo hayo.

Viashiria vilivyotajwa hapo juu vilipelekea vipindi vya mvua zinazoambatana na ngurumo na radi katika maeneo ya ukanda wa ziwa Victoria na mvua katika maeneo ya ukanda wa pwani pamoja na nyanda za juu kaskazini mashariki.

TATHMINI YA MVUA KATIKA KIPINDI CHA SEPTEMBER 1-10, 2026

Katika dikadi hii, baadhi ya maeneo nchini yalipata kiasi cha mvua ya siku kumi cha kati ya mililita 1 hadi 25. Hata hivyo, maeneo machache ya mkoa wa Mbeya na kusini mwa Morogoro yalipata kiasi cha juu cha mvua cha kati ya mililita 51 hadi 100 kama inavyoonekana kwenye kielelezo.



Kielelezo: Kiasi cha mvua katika kipindi cha Septemba 1-10, 2026

TATHMINI YA HALI YA KILIMO KATIKA KIPINDI CHA SEPTEMBER 1-10, 2026

Katika dikadi hii, hali ya ukavu inayoendelea katika baadhi ya maeneo nchini ilisaidia uvunaji, ukaushaji na uhifadhi mazao maghalani. Hata hivyo, hali ya mvua iliyojitokeza katika maeneo machache nchini hususan kanda ya Ziwa Victoria, Pwani ya kaskazini na kusini ilisaidia kuongeza unyevunyevu katika udongo na kusaidia ukuaji wa majani kwa ajili ya malisho ya mifugo.

Kwa upande wa mazao ya kudumu, zao la kahawa katika mikoa ya Kilimanjaro na Songwe ilikuwa katika hatua ya kukomaa.

Kwa upande mwingine, karafuu katika Visiwa vya Pemba na wilaya ya Mheza mkoani Tanga, zilikuwa katika hatua ya kuanza kukomaa na wakulima waliendelea na uvunaji wa zao hilo. Halikadhalika, Kizimbani zao la karafuu lilikuwa katika hatua ya **'vikucha'**.

Kwa ujumla, upatikanaji wa maji na malisho kwa mifugo vimeendelea kupungua kutokana na hali ya ukavu iliyopo.

HALI YA MAJI KATIKA KIPINDI CHA SEPTEMBER 1-10, 2026

Kwa ujumla kina cha maji katika mabwawa na mtiririko wa maji kwenye mito kimeendelea kupungua kutokana na hali ya ukavu inayoendelea.

MIFUMO YA HALI YA HEWA INAYOTARAJIWA KATIKA KIPINDI CHA SEPTEMBER 11-20, 2026

Katika dikadi hii, migandamizo mikubwa ya hewa iliyopo kaskazini mwa dunia inatarajiwa kuimarika kidogo wakati ile iliyopo kusini mwa dunia inatarajiwa kupungua nguvu. Hali hii inatarajiwa kusababisha sehemu ya ukandamvua kusogea kidogo kuelekea kusini nje ya nchi.

Aidha, mifumo ya hali ya hewa iliyopo katika ukanda wa Ziwa Victoria pamoja na upepo wa bahari wenye unyevunyevu uvumao kutoka mashariki na kuelekea katika maeneo ya ukanda wa pwani ya nchi na maeneo ya jirani vinatarajiwa kuimarisha kwa vipindi vichache mifumo isababishayo mvua katika maeneo hayo.

HALI YA HEWA INAYOTARAJIWA KATIKA KIPINDI CHA SEPTEMBER 11-20, 2026

Maeneo kanda ya Ziwa Victoria (mikoa ya Kagera, Geita, Shinyanga, Mwanza, Simiyu na Mara), yanatarajiwa kuwa na vipindi vya mvua zinazoambatana na ngurumo za radi katika maeneo machache.

Nyanda za juu kaskazini-mashariki (mikoa ya Arusha, Manyara na Kilimanjaro), pwani ya kaskazini (mikoa ya Tanga, maeneo ya kaskazini mwa Morogoro, Pwani na Dar es Salaam pamoja na visiwa vya Unguja na Pemba) kunatarajiwa kuwa na vipindi vya mvua katika maeneo machache.

Pwani ya kusini (mikoa ya Mtwara na Lindi) kunatarajiwa kuwa na vipindi vya mvua nyepesi katika maeneo machache.

Magharibi mwa nchi (mikoa ya Kigoma, Katavi na Tabora), nyanda za juu kusini-magharibi (mikoa ya Rukwa, Songwe, Mbeya, Njombe na Iringa), kanda ya kusini (mikoa wa Ruvuma na maeneo ya kusini mwa Morogoro) pamoja na kanda ya kati (mikoa ya Dodoma na Singida) kunatarajiwa kuwa na hali ya ukavu kwa ujumla.

HALI YA HEWA KILIMO: MATARAJIO NA USHAURI KATIKA KIPINDI CHA SEPTEMBER 11-20, 2026

Hali ya ukavu inayotarajiwa katika baadhi ya maeneo nchini, itasaidia katika shughuli za uvunaji, ukaushaji na uhifadhi wa mazao maghalani. Hata hivyo, hali ya mvua nyepesi inayotarajiwa katika maeneo machache hususan nyanda za juu kaskazini-mashariki, pwani ya kusini na kaskazini inaweza kusaidia ukuaji wa majani ya malisho kwa ajili ya mifugo. Pia hali hii inaweza kuathiri shughuli za uvunaji, ukaushaji na uhifadhi wa mazao.

USHAURI:

- **Maeneo yanayopata misimu miwili ya mvua kwa mwaka (Kanda ya Ziwa Victoria, nyanda za juu za kaskazini mashariki na pwani ya kaskazini):** Wakulima wanashauriwa kufuatilia utabiri wa hali ya hewa wa kila siku na kujiandaa na mvua za muda mfupi zinazotarajiwa katika maeneo machache.
- **Maeneo yanayopata msimu mmoja wa mvua kwa mwaka (pwani ya kusini, maeneo ya magharibi, maeneo ya kati, nyanda za juu za kusini magharibi na maeneo ya kusini):** Wakulima wanashauriwa kuendelea kuvuna mazao na kuyahifadhi vizuri maghalani huku wakiendelea kufuatili taarifa za hali ya hewa za kila siku.
- **Wafugaji:** Wanashauriwa kuendelea kutumia maji na malisho ya mifugo kwa uangalifu na kufuatilia tarifa za hali ya hewa za kila siku.
- **Wavuvi wanaotumia Bahari na Maziwa makuu:** Wanashauriwa kuendelea kufuatilia utabiri wa hali ya hewa wa kila siku ili kuchukua tahadhari hususan wakati vinapojitokeza vipindi vya upepo mkali na mawimbi makubwa majini.

Ushauri huu unalenga kuongeza tija ya kilimo na kupunguza athari zinazohusiana na hali mbaya ya hewa. Wakulima na wadau wa kilimo wanashauriwa kutumia taarifa za hali ya hewa kwa ufanisi na kushauriana na maafisa kilimo katika maeneo yao ili kufanya kilimo chenye tija.

HALI YA MAJI INAYOTARAJIWA KATIKA KIPINDI CHA SEPTEMBER 11-20, 2026

Kina cha maji katika mabwawa na mtiririko wa maji kwenye mito vinatarajiwa kupungua kutokana na hali ya ukavu inayotarajiwa. Jamii inashauriwa kuhifadhi maji kwa ajili ya matumizi ya baadae.